

乾隆四十七年重修

續志附錄

襄

江苏工业学院图书馆章
藏書

縣志

板存雜貨行

目錄

卷一

輿圖

山川全圖
關帝廟圖

城池圖
城隍廟圖

縣署圖
文廟圖
劉文安公祠圖

西祭圖
八景圖

星野

星圖

疆域

山川

沿革

表圖

卷二

建置

城池

縣署

公署

壇墀

職官

官秩

縣令

縣丞

主簿

教諭

長江系示

卷二 目錄

卷三

學校

文廟學規

明倫堂

書院

社義學

弟子員 賜書

禮樂

祭祀救護

朝賀上官

宣讀賓典

巡春鄉飲

耕藉

風俗

節序鄉儀

土產

穀米貨

菜

果

藥

花

草

卷四

古蹟

城壘陵墓

寺觀義塚

井泉橋梁

碑碣

賦稅

戶口商稅

田賦積貯

鹽課

恩錫

賜封勳免

恩蔭壽官

養老義官

卷五

選舉
義
例職
進士
舉人
吏職
賓介
附錄

卷六

人物
鄉賢
德行
忠臣
孝子
義士
節婦
烈女
賢婦

列女
節婦
烈女
賢婦

卷七

藝文上
詩
論
記

藝文中
記

卷八

藝文下
詩
賦
歌
贊
雜
紀
銘

重修襄垣縣志卷之七

知縣李廷芳編輯

藝文中記

明

展修文廟學宮記

邑人 郝良臣

嘉靖壬戌懷進士湛泉蕭公受命來尹茲土居二載政始成乃謀修學宮因謁廟集諸儒於講堂命之曰凡廟學之在天下恒必擇靈區與壤又多規制宏深者非以侈觀望也蓋廟以奉祭祀學以育賢才譬之於人必正衣冠尊瞻視然後可以弭人之嫫慢起人之敬畏今廟學雖設然起於陌巷區位湫隘垣墉短

淺甚不足以展安伯鳴教鐸發舒多士之氣也吾將
爲子濶新之何如眾喜曰諾適學田歲有得乃市材
先事廟工買民舍改街衢縱展十丈有奇橫展皆稱
又選鄉民之良實者曰王斌郝其保郭安恩趙朝以
董課之功未半湛泉以年滿陞秩去是歲冬適大梁
進士節齋李公來繼之蒞政初卽興舉百廢尤先注
意廟學且詢知前功所以遂止者由費不足卽先捐
俸金若干兩又倡寮友及學官諸生邑士大夫闔境
義民各相補助時應者如響不旬日得三百餘金乃
分布衆役計日程工修正殿五楹併修東西廡內外

門廟街左右兩坊及啟聖名宦鄉賢諸祠宇共計五十餘楹又置泮橋一座皆飾以蒼翠複院繚垣枚枚實實視昔之戶不蔽影大相雲泥乃遂移築學宮縱展橫展之度皆與廟長廣相埒其門堂序塾亦無不中矩矍者歲丁卯爲隆慶改元始竣事於是節齋公暨二三寮佐及學師來徵文子不文顧所言公則當公言之何可以不文默也惟國家以武定天下而以文守之故兩京有監郡縣有學至於窮荒絕域皆知尊崇孔子之道赫赫濯濯亘古所未有也故常於守令考最陟明必以興教育材爲第一蓋文事興則六

事舉矣詩曰愷悌君子令德來教言有文事也今食
人之祿而荷人之爵能以文事爲首事者幾人哉自
我公踵成蕭公之美如璧照珠聯焜燿先後不將愧
凡令之鰥曠者耶夫有開必先者二公之烈也希之
則是者吾人之責也他日多士出而有爲必尊主庇
民事功赫奕斯有光展修之役矣是爲記

均糧記

郝良臣

先王建邦啟土度地居民其分田制賦之法相沿非
一日矣自夫井田廢而阡陌起大道隱而橫歛興凡
言人合併爲公之意殆泯沒漸滅莫之存什一於千

原书缺页

原书缺页

多益寡之遺意也是後法久弊生富豪之家重賄里
書巧爲飛詭教令全用混淆鬼蜮難辨而呂之有識
者徒以切齒瞋目矣乃嘉靖丙辰我昌黎王公以妙
齡登制科奉命來尹吾邑徧詢疾苦真知前弊乃昕
夕憂惶惓惓焉思所救正因獲一二黠胥鞫訊之凡
均攤馬免影射於各家者始得其梗槩而其間猶有
曲爲掩護恡吝不肯承伏者公研究益力百方鉤索
雖合勺之微必有端委而後已戊午秋始復舊額而
竣焉昔先正邱文莊公欲除兼併之患立貢賦之法
後竟格於不行今我公不二載而刷清累年之弊其

有光於文莊不淺矣予遷官方岳被放西歸適邑博士趙君與諸庠生徵予爲記予不文顧予昔典銓曹類不敢蔽賢沒善况均糧一節雖學士大夫嘗苦於包賠者皆重沐膏澤湔滌虧累將不獨子惠困窮已也予援筆數語亦以附異時口碑之萬一耳若夫勒鼎彝垂竹帛鴻名駿烈響震廟堂則另有所記者在也予不敢妄爲序述併查明實徵條欵俱別著於碑陰云公諱尙直字舉之松坡其別號也

重修昭澤王廟記

郝良臣

嘉靖辛卯秋九月重修昭澤王廟成首事者徵文於

予予不文緣躬覲其榮遂弗敢辭按縣志爲唐異
人以秘術安濟時艱民賴以生沒之日民用不忘維
是有廟廟在縣之離方歷唐季五代宋元暨我明一
統世不廢祀正殿五楹歷歲頗久漸以棟撓於是焦
黨王斌崔景然郭宏寬黃公庭史繼郭才盛黃堯臣
郭宏澤輩率額有衆飭材鳩工始事事焉又募於邑
厥應如響旣備乃布尋累堂疏牖壯闔丹黝髹漆方
桷圖櫟實實枚枚孔曼且碩起春三月壬辰止九月
戊戌凡二十有一旬乃襄其事旣落成觀者堵進爭
擊羊豕雉魚執醴醢寓信辭伐鼓嘯簫虔潔跪奠以

告厥成功維昔聖賢儼在祀籍纔可屈指間或以殖
或以平或以序或以勤或以寬或以文皆鑒鑒可考
是皆功鉅驗遠故越在異世鬱有馨香人心翼戴饗
報不已被禮樂而崇儀章擬於生者吾王術妙當世
捍禦薦多而默感冥通越世尤甚視前數聖賢雖考
履殊祥亦要均之潤下而奇流不可謂非水也則今
寃安宅以引以長實分所以誰曰有可隆替哉雖然
廢興成毀物數皆然既剥而復既夬爲姤消息無停
天行之則物數象之矣廢興成毀相尋無窮耳目屢
遷誰能爲一今諸君有是舉也則固爲興爲成爲數

之更爲時之復爲事之共爲耳目之一新顧不可優
嘉也乎敢望如諸君者於千百世焉是爲記

城隍廟碑記

郝良臣

城隍廟之設自我朝郡縣區夏卽各建祠宇以叙列
百神制也予邑之有廟與營作之次第則有前人載
記詳矣顧其制尙多簡陋未足以展祀妥神其後稍
稍增葺漸備如後寢如兩廡如前之作樂樓如旁之
神厨道院之類作者非一人成者非一時於是前殿
之捲棚與亭與坊則猶闕如也今年春隣廟鄉民王
斌等切念之乃僉謀虔告於神而事事焉各捐貲以

爲木甃瓦石之資邑人應者如響於是五材畢集百
工協奮審曲面勢計日成之建捲棚三楹不施牆牖
噲噲焉畧如今官府之疊室東西碑亭二座則稍殺
於棚之制以附麗阼階牌坊二楹則內準門之大小
外量衢之廣狹而施等焉飾以丹黝崇以陶甃赫赫
濯濯秩然備矣起嘉靖乙卯二月十七日止六月二
十九日凡十有三旬乃襄其事王斌等走使南京徵
予文紀諸石郝氏良臣曰神依人而血食人依神以
怙冒隱顯相維合一無二者也故僨在祀籍纔可屈
指大而經帶具瞻則河海岳瀆焉散而正名民